


De Prima ciborum concoctione
hoc est de Chyli & sanguinis
Materia
anno 1542 Jo: Stadius










o gef.

172
 $\frac{1}{2} \text{ h. } \overline{\text{IX}}/3$

7311/A



Edmundi Hollyngi,

EBORACE
NI ANGLI,
DOCTORIS MEDICI,
ET PROFESSORIS IN-
golstadiani,

DE CHYLOSI, HOC
EST, PRIMA CIBORVM,
*quæ in ventriculo fit, concoctione; pro
veteri medicorum schola, Dis-
sertatio.*



INGOLSTADII.

Ex Officina Typographica VVolfssgangi Ederi.

ANNO M. D. LXXXXII.



349036



SERENIS-
SIMO PRIN-
CIPi AC DOMINO,
D. MAXIMILIANO, COMITI
Palatino Rheni, vtriusq; Bauariæ Du-
ci &c. Domino suo Clemen-
tissimo.

EDMUNDVS HOLLYNGVS,
*Anglus, se, sua dicat, consecrat
omnia.*

EST (serenissime Princeps)
nostra ætas, si qua alia, ferax
rerũ omnium, bonarum, ma-
larum, & quæ inter has am-
bigunt: quanquàm malo quo-
dam non syderis, sed nostræ
voluntatis, feracior sanè malarum, quàm bo-
narum.

PRÆFATIO.

Omnes agunt, vel contemplantur. Qui agunt, vno tantum modo rectè agunt, & hunc vnum modum ætas nostra eò & videt clariùs, & certius sequitur, quò est ab vsu instructior, vnde factum est, vt singulos, qui ante nos aliquid egerunt, nostri homines, multis sanè partibus vincant & superent. Et contemplantibus etsi vnum in quaquè re verum scopus sit, tamen hoc verum quia sensu non percipitur, sed quæritur intellectu, fit, vt ij dilabantur, in suam quisque opinionem, putent què id solum verum, quod ipsi inuenerunt, atq; ament, quod inuenerunt, potius vt suū, quàm vt verum. Volumus, quicumquè sapimus, altè sapere, præ alijs sapere, soli sapere. Ex hac peruersæ voluntatis semente, messis illa hodiè nouarum opinionum (taceo reliqua mala) surgit, vberiq; spica se spargit per omnium scientiarum agros: sic, vt vnde ante collegimus antiquitatis purum putum fructum, indè nūc cogamur quisquiliis corradere & paleas nouitatis.

Sapiunt nouè, in religione Calvinus, in Philosophia Ramus; in alijs scientijs & artibus alij. Sapere, aut contrà Romam Caluinum,

PRÆFATIO.

num, aut contrà *Academiā Ramum*, aut contrà antiquitatem alios, hoc ipsum & si sit desipere: tamen his paulò equior essem, si quod adferunt nouum, illud exigèrent ad rationis normam, & non ad vulgi sensum. Rudia planè dicunt hi nouarum opinionum fabri, & dum defluunt circa sensum tantum, perdunt rationem.

Huius notæ partim scriptores, partim interpretes non desunt medicinæ nostræ, qui, vt videantur noua mysteria eudere, veterem scholam repudiant, & opiniones protritās illas quidem, & cum vulgi sensu proximè congruentes, ex triuio arripiunt, sequè putant reconditè doctos, si vulgi opiniones, aut peruersitates potiùs vulgo probent. Ego, postquàm me dedi in scholæ circum, aliam cucurri viam. Nam visa mihi semper est omnis, aut via non tuta, quia non trita, aut doctrina suspecta, quia noua. Antiquè sapere, hoc demùm putauī verè sapere. Quare vt in religione Romam prætuli Angliæ, in Philosophia *Academiā Ramo*: sic in medicina Galeno veteriquè scholæ postpono, & quamdiu suppetit vita, postponam sectas

P R Æ F A T I O .

omnes, quas recens medicorum schola numerat plurimas. Non tamen hos novos medicos omnino repudio, quasi nihil commentantes ad normam, sed quod sanum commentantur, id ab insania nanis, quas interspargunt sanè plurimas, repurgatum, amplexor & recipio. Philosophantur de ventriculo tanquàm de fornace, de calore eius tanquàm de flamma, rusticis quidè argutè, medicis verò ineptissimè, nam medici, rudere hoc esse, nō Philosophari, aut medicū agere, certò sciunt. Contrà hos novæ medicinæ architectos collegi, et colligo semper quātum perpaucis diei horis, quas schola mihi facit reliquas, possum. De coctione verò ventriculi, quia nō ita pridem quidā sapiunt contrà veterē scholam, volui ostendere, hos novè sapere, id est, vix sapere, aut certè non satis sobriè. Clarè disserui, & strictim: Clarè, vt laborem, strictim, vt tedium minuam lectori.

Hanc meam opellam, vestræ (Serenissime MAXIMILIANE) celsitudini cur nuncupem, res imprimis sunt causæ, vestrum iudicium, mea obseruantia, res ipsa. Prima, vestrum in literis iudicium, exquisitum sanè illud, & multo stu-

P R Æ F A T I O .

ro studio expositum. Nam serenissimus in hac Academia quamdiu fuit, ea laude publice, priuatim ipse deseruit, ut huic meae dissertationi non velim optare alium iudicem, ea voluptate alios audiuit disserentes, ut mihi iam sedate differenti, non alium debeam adprecari patronum.

Altera causa est, mea in V.C. obseruantia, elicit plurimis & sanè maximis Serenissimi Patris vestri in me meritis. Excepit exulem, misit in Italiam, aluit liberaliter, posuit in Cathedra, & quasi quadam Clementiae suae manu nouus Prometheus, me, qui sum, totum refinxit. Qui me optimo Parenti vestro totum debeo, eius optimo filio nisi me totum dedam, impie certè sim ingratus. Dedo, dico, consecro huius scripti quaedam quasi syngrapha.

Tertia causa, ipsa res. Pugno pro veteri schola. Et nulla laus tam natua, & quasi propria familiae Bauaricae, quàm stare (ut loquar cum Tertuliano) contra nouellitatem. Hinc familiam Bauaricam tonant, Gallia, Hispania, Italia, & in Italia orbis domina Roma, huiusquè familiae Principes singulos, & omnes, suspiciunt, quòd arctissimè proximè quo


PRÆFATIO.

meque urgent viam, antiquorum vestigijs signatam.

*Quare qui infringo nouellitatem, aptè
elegantèque videor seposuisse mihi patronum
& iudicem, Principem illius familiæ, cuius
summa laus, esse hostem nouellitatis. Deus se-
renissimum, quàm diutissimè seruet, Patriæ,
Ecclesiæ, mihi.*

Vestræ Serenitati
æternùm deuotus,

Edmundus Hollyngus,
Anglus.



PRÆ-

PRÆCEPTOR: DISCIPVLVS.

DISC: Inuitasti nos sæpè
(Præceptor) quotquot &
nunc adsumus, & tuis an-
teà prælectionibus inter-
fuimus, necnon benig-
nè es adhortatus, vt si-
quid difficultatis occurreret, esset uè,
quod contrà tuas assertiones posset obij-
ci: id totum poneremus, datumque
te operam es pollicitus, ne quis à te rece-
deret, cui abundè satisfactum non sit.
Quarè, cum in prælectionibus tuis Ana-
tomicis, de prima, quæ in ventriculo sit,
ciborum confectione, multa insparseris,
non graua tantùm, sed etiam dura, &
quæ nullo modo concoxero, fretus tua,
partim humanitate, partim fide, ea posi-
turus accedo, & rogo, qui me exercent
scrupi, eo tu mihi non inuitus eximas o-
mnes, & euellas ex animo. PRÆC.

PRÆC. Nolo putes, me aut frustrà vos inuitasse, aut quod officij est mei, gravatè facere. Postulat autem officij mei ratio, nullos vnquàm labores vt subterfugiam, modò sciam, me vestris studijs & vtilitatibus posse inseruire. Age igitur, quæ tibi dura videntur, illa exprome liberè, hæc enim quæ tu dicis dura, ratione tanquàm aromate ita condiam, vt à te non solùm facilè concoqui, sed etiam in succum, bonumquè sanguinem conuer-
ti possint.

DISC. Inter alias concoctionis primæ causas, calorem numerasti, & adiecisti, verissimam esse hanc sententiam, quam rationibus primùm afferuisti, & multis dein medicorū Philosophorumq;, non modò antiquorū, Græcorum, Arabum, ac Latinorum, sed recentiorum etiam testimonijs, confirmasti. Hanc ego ipsam impugnabo, probaboq;, tum ex ipsis medicorum placitis, tum alijs rationibus nonnullis, fieri non posse, vt calor, vllum præstet in cibis conficiendis, obsequium.
Atq;

Atq; , nè existimes , me , rationes collecturum ex triuio , non ego huc adferam ingenij mei tarditatem , & tenuitatem , sed ex libro Germanico , foelicissimi ingenij magno partu , edam duodecim plus minus argumēta , acuta sanè illa , & non mea solius opinione , sed & doctissimorum quorundam iudicijs , plusquàm Achillea . Ea (si placet) sigillatim ponam ; atq; (vt illorum vires altius perpendas) ex Germanicis Latina faciam , quidq; ad singula responderis , tabellis his meis excipiam .

PRÆC. Librum narras , ni fallor , à CHRISTOPHORO FERRIOLO , viro sanè ingenio singulari , eruditione recondita , & in medicinæ mysterijs versatissimo , editum . Is namq; librum edidit , tribus capitibus compræhensum , quorum altero , hæc tua argumenta , plusquàm Achillea , continentur , aut si quis fortè alius , cedò hominem .

DISC. Ipse est ; sed Germani opus , Anglo , idq; Germanicè scriptum , planè tibi putabam ignotum .

PRÆC.

P R Æ C. Quò magis aut ille Germanus, aut opus Germanicum, eò faciunt magis ad gustum meum; Nam hac siue lingua, siue gente, si quis externorum, ego certè delector maximè. Verùm non erit mihi ingratum, si tu latinè etiam reddideris rationes illas. Sic enim experiar, an ego, sinè interprete, rectè sim illius mentem assequutus, &, an tu horum argumentorum, siuè vim, siuè notionem penitus inspicias: quorum vtrumq; facilius liquebit, si argumentis his, quasi tuis vtare, neq; integris tamen, sed retextis in syllogismos aut Enthymemata, quia illi docent, hæc premunt.

D I S C. Geram tibi morem, non ægrè tamen feres, si interdum pauca ex meis adtexuero, quæ aut vim ipsius argumentis addant, aut quæ ab ipso dicta sunt obscurius, patefaciant.

P R Æ C. Ne teras tempus, sed in re ipsa ponas vestigium, de modo sit quod tu vis. Nam quò es, aut in dicendo clarior, aut in vrgendo acrior, eò tu à me meliorem gratiam inibis,

D I S C.

D I S C. Quod vis igitur, pergo. Primi **l.** argumenti vis hæc mihi videtur. Concoctionis ventriculi actio, est Chylificatio, sed chylus per actionem caloris non fit, ergò calor in concoctione ventriculi, nullum tenet principatum.

P R Æ C. Noli à me expectare ambages, satis, si negem, affirmem, aut distinguam in singulis propositionibus, quod est negandum, affirmandum, aut distinguendum. Ad maiorem in hoc syllogismo propositionem quod attinet: nego concoctionis ventriculi actionem, esse chylificationem. Imo concoctio ventriculi, ipsa est chylificatio, & è conuersò. Quæ igitur natura coniunxit, illa tu malè oratione disiungis.

D I S C. Itanè? cur ergò recentiorum plurimi, inter quos est Archangelus Piccolhominus, & Dominicus Leonus (alios taceo) hæc ipsa non oratione tantum, sed etiam ratione secernunt?

P R Æ C. Qui nimis subtiles, aut esse, aut videri volunt, in grauissimos interdum

dum errores incidunt. Dic rogo, quid intersit, inter calefactionem, & caloris in re aliqua impressionem? Atqui, non est profectò plus discriminis, inter coctionem, quæ ventriculi est propria, & chylicationem. Rectius igitur dixisses: concoctionem ventriculi esse chylicationem. Sed mitto hæc. Ad minorem quod spectat, si velis, per actionem caloris solius non fieri chylum, concedo, neq; enim hoc assertioni nostræ aduersatur. At, si caloris actionem, nulla ratione contendas, ad chyli confectionem concurrere, nego.

DISC. Posterius hoc, non solum volo, sed probo. Chylus fit per resolutionem substantiæ solidorum ciborum in humorem, &c. Sed caloris non est, solidam substantiam, in aquam, aut humorem alium, resolvere, sed calefacere potius & exiccare: proindè, calor quantum in se est, nihil habet muneris, vel officij, in chylo conficiendo.

PRÆC. Particula illa (PER) quæ in maiori propositione ponitur, duplicem habet

habet sensum, &, id cui coniungitur, innuit esse, vel causam formalem, vel conditionem sine qua non. Dum dicimus, hominem esse hominem, per animam rationalem, formalem notamus causam: Dum ignem, per approximationē comburere, causam, sine qua non fieret combustio. Adeundem modum, propositio illa maior, potest intelligi. Si dicas, chylum à sola resolutione, tanquam causa formali & adæquata, suam sortiri & naturā & appellationem, id dicis, chylificationem, esse resolutionem tantum totius substantiæ ciborum solidorum, & præter hanc nihil, de qua notione post videro. Si verò putes, chylum non fieri, nisi resolutione tanquam condito ad chylificationem requisita præcedat, verum putas, à quo ego caueo, ne aberres latum vnguem. Priorem notionem videbis perspicuè falsam, si chyli definitionem ponas & ponderes. Chylus (teste Galeno) est succus, ita à calore subactus, ut inter siccum & humidum mediam teneat consistentiam:

*Chylificatio
quid sit.*

Chylus.

tentiam: Estquè non simpliciter humor, sed humor quidam, in crassitiem coactus, proprièquè eum succum signat, quem ventriculus, è cibis, per coctionem elicit, &, qui proxima sanguinis materia, existit: Ex hac definitione liquidò quàm apparet, coactionem illam, siue (vt cum schola loquar) increffationem, ad chylicationis naturam, propius accedere, quàm resolutionem. Etenim quæcunq; in chylum conuertuntur, cogantur, & increffentur necesse est, vt autem resoluantur, non item. Non enim opus est, vt sorbitiunculæ, iuscula, potiones, & quæ cum his eiusdem sunt rationis cibaria, resoluantur, tamen, nisi coacta, & increffata, in chylum nunquàm immigrabunt.

D I S C. Audi obsecro. Præter sorbitiunculas, iuscula, potiones, & huius ordinis alia, quæ pauca admodum sunt, si cum eis conferantur, quæ solida existunt, reliqua sanè omnia resolutione video indigere, increffatione autem indigere, non video:

video. Quare, cum res antequàm in chylum exeunt, plurimæ resolui, paucæ in-
crassari debeant : certè in chylicatione
(si tua ratio firmamentum verum habe-
at) maior vis erit resolutioni, quàm in-
crassationi.

PRÆC. Collimas quidem in metam,
non tangis tamen: Non enim dixi, quæ in
chylum vertuntur, in crassari plura, sed in-
crassari omnia, non autem resolui om-
nia: vndè planè conficitur, longius abesse
à chylicatione, resolutionem, quàm
incrassationem. Non omnia resolui pri-
us docui, in crassari autem omnia, (non
excipio solida cibaria) faciam vt videas,
nisi tu fortè in Philosophicis talpa. Cibus
(quod nosti) solidus cum primùm in os
sumptus, manditur, frangitur, exteritur,
saluæ tandem cōmixtus, deglutitur, po-
steà, in ventriculo potulentę materię per-
miscetur, ex potibus demùm & cibis, cō-
tritissiam, & comminutis, chylus gignitur,
non prius tamen, quàm liquatis omni-
bus, & in vnum confusis, totam substan-
tiam

tiam ex cibis & potibus exeuntem, concoctio crassiorem reddiderit, non crassiorem intelligas, quàm solidam ciborum substantiam, sed quàm substantiam, quæ ex aridorum cum humidis, & solidorum cum liquidis, perfusione, facta erat, ex qua scilicet perfusione, chylus materiam generationis accepit.

DISC. Affeque videor quod velis, vis namquè, primùm, cibaria solida resolui, & cum liquidioribus permisceri, ac totam substantiam ex vtriusque aptam, seipsa per coctionem reddi crassiorem, atque ita concoctionem (ut dixit Galenus) fieri, vi & via increpationis.

PRÆC. Tetigisti, non collimasti tantum. Nam cum cibi nomine censeamus, non solam carnem, aut panem solum, sed quicquid potulenti & esculenti ingerimus: cum dicimus, cibum in crassitiem prius cogi, quàm in chylum verti: istud dicimus, de cibis liquidis & solidis, in eandem substantiam confusis: ita tamen, ut semper intelligas, prius resolui, resoluenda. Nunquid præterea vis?

DISC.

DISC. Quid velle debeam in tam clara veritatis luce?

PRÆC. Sed heus. Chylus adhuc non est perfectus. Nam nec resolutio, (cuius tu iniecisti mentionem) nec mea hæc incrassatio, verā chylicationis rationē obtinet. Clara res est, & extrā disceptationem. Si enim his vtrisque, vel harum altera, totam chylicationem definiremus, positis illis, necesse est, & *πυλωρὸς* aperiat, & chylus iam confectus à ventriculo, in intestina deuoluatur, ac tandem ab intestinis in venas deriuetur, siquidem vltimus & proprius ventriculi terminus, est chylus. At ventriculus ipsum adhuc retinet, clarū ergò est, desiderari præterea aliquid, ad chyli absolutionem. Istud ego statuo, & cum artis nostræ mystis defigo, post incrassationē, esse, in ipsum cremorem, propriam ventriculi qualitatem impressam. Cibus nisi huc venerit, coqui dicitur, non coctus. Est enim coctio, conuersio alimenti, in peculiarem & propriam,

cuius quod alitur, qualitatem. Vbi verò
cibus habuerit illam qualitatem, non ci-
bus amplius dicitur, sed chylus, aptus iam,
qui à iecore tractus, in sanguinis natu-
ram mox possit abire, quod quidem nos
in nostra chyli definitione innuimus, &
quasi digito indicauimus, cum ad textu-
issemus, chylum esse proximam sangui-
nis materiam. Turisanus etiam Mona-
chus, hoc ipsum quamuis non eleganter,
luculenter tamen expressit, cum diceret,
*cibum perfectè digestum esse in stomacho, quan-
do est aptus, receptioni digestionis hepatis, &
sic inde. Proportionem enim quandam (inquit)
habent membra naturæ agnitæ, penès vitam,
sicuti chordæ in cythara, penès sonum: & tunc
est perfectio vitæ, quando vniuscuiusque mem-
bri virtus, reddit opus, quod suum est, per com-
parationem ad alteram, quasi ciuitas benè dis-
posita. Propter quod & Damascenus ait, quòd
compositio animati corporis, ad figuram consoni
est numeri.*

D I S C. Longè quidem aliter, explica-
sti chyliificationis naturam, atque ego
puta-

putabam : non habeo tamen, quod contrà hiscam.

PRÆC. Haftenùs ostendi, chylicationem non esse resolutionem. Ostendam modò, si esset resolutio, posse nihilominus fieri à calore, caloremque, posse res solidas resolvere: quod te in minori propositione, negasse (philosophus cum sis) mirari satis non possum. Quotus enim quisque est, qui non videt, res quantumvis solidas, igneæ potestatis vi, aut non sine ipsa, liquari, fundi, molliri? Et nè me fortè putes contemptorem artis, chymistæ, si non efferrent pedem extrà hanc lineam, haberent hìc, cur gloriètur de suo auro potabili, de auri oleo, de ferri oleo & aqua, deque rerum penè innumerabilium, in quibus Aristoteles cæcus erat & hospes, liquationibus. Imò tam altè penetrârunt in naturæ adyta, quichymix student, vt, vi ignis, ex rebus planè omnibus, liquores facilè, & vsui humano commodè, eliciant. Paracelsi, Lullij, Geberi, Vlstadij, Euonymi, Bracefchi, Tau-

lada ni, Alberti Magni, Rubei & aliorum, tum antiquorum, tum recentiorum libros euolue, videbis sanè, rem non modò ita se habere, sed tam multa ab ijs, & tam magna perfici, vt ipsa penè natura miretur, se ab arte aut erutà, aut victam. Nequè mirum hoc tibi videri debet, qui ex Platone didicisti, ignem, vt exquisitissimæ esse tenuitatis, ita maximæ esse actionis, penetrare, spargi, grassari, nulliusquè rei, aut loci cancellis coerceri. Aristoteles non longè hinc abiit, qui tribuit, calori, homogenea cogere, heterogenea verò segregare, atque secernere: quibus rebus, quicquid est in arte chymica, totum conficitur. Si Aristotelem fortè & Platonem, philosophorum omnium facilè principes, non velis audire, vocabo te ad mulieres, chymistarum simias: quæ siuè furnos extruant, siuè instruant focos, siuè alias nugas nectant, inutilesquè liquaturas exerceant, docent tamen vim ignis, tam clarè, vt philosophus præ pudore non debeas hic hære. Quæ cum ita sint, miraberis, naturam

turam (cuius ars quædam est velut æmula) cibos solidos calore suo primum liquare, liquatos deindè cogere, coactos demùm in conuenientem naturam conuertere?

DISC. Verè tu quidem, quanquàm philosophorum vulgus vix vnquàm capiet, tantum esse in ventriculo caloris, quantum in chymicorum furnulis.

PRÆC. Quid narras furnos chymicos? Debemus nec nos hoc dicere, nec vostam crassè cogitare. Vt enim, alia alijs dēfiora aut rariora, tenuiora aut solidiora: ità, his aut illis liquandis soluendisque, lentior, vehementior ignis adhibetur. Disce hoc à chymicis, qui non eandem ignis vim semper adhibent, sed hìc, Mariæ balneo, ibi, equino fimo, alibi, cineribus, aliquando, oliuarum recrementis, rariùs, pura puta flamma vtuntur. A Philosophis hauserunt, ignem qui lentior est, aut vehementior, quàm pro re, coctionem liquationemque omnem vitare. Quare, qui à ventriculo solui debent

cibi, cum mediocritatem substantiæ habeant, nec ita solidi ut lapides, nec ita, ut metalla, densi sint, mediocritas profectò caloris illos conficiet & cōcoquet, nisi tu fortè ad liquationem in ventriculo, ut quondam Erasistratus, ad elixationem, requiras grandem nescio quem calorem. Certè si tu mihi velis esse nouus Erasistratus, ego ero tibi hac parte nouus Galenus, rudemque te & ridiculum dicam, quasi ventri Aetnam subiiciendum putes.

DISC. Ne sim tibi ridiculus, nolo de calore esse Erasistratus: Tamen de elixatione (quia insparisti memoriam) non video, cur debeam aut velim non esse tibi Erasistratus. Quid? tu ne ergò ventriculi coctionem putas esse elixationi similem?

PRÆC. Non puto, sed scio: quamuis istud, fortassè non est huius loci, fusiori filo differere.

DISC. Quia tamē elixationis vox, incurrit in nostrum sermonem, expedi mihi, quaeso, scrupos, qui de hac re me exercent, nec pauci nec parui.

PRÆC.

P R Æ C. Effer, si quos habes, planandos, sed cum conditione, ut elixationis vim, breui oratione prius definias, sic enim erit oratio plenior & planior.

D I S C. Elixatio est, vnius qualitatis aut humoris, ex solido corpore, relictis alijs crassioribus & durioribus, quædam expressio, & (ut sic loquar) elicitio.

P R Æ C. Quàm longè tu à scopo? Ego volo elixationis naturam, tu mihi obtrudis, nescio quam destillationis definitionem, nisi fortè contendas esse eandem vtriusq; definitionem, atq; hanc ab illa id tantum differre, quòd, per destillationē, humor guttatim cadat, per elixationem verò, copiosè effluat. Si hac hæresis es, proderet te mihi debebas, in definitione. At alius est Aristoteles, qui elixationem definit, concoctionem interminati, quod est in humido, vi caloris humidī. Ac si diceret (pro ut optimè docet Valesius) elixatio, in communi ratione, est concoctio imperfecta: profecta à calore humido, hoc est, à succo calido, in quo res co-

B 5 quitur,

coquitur, cum rerum, quæ elixantur, succus inditus, vel natiuus humor vi sua interminatus, vel (vt dicam) indomitus, malèquè mixtus, finitur iam, & terminatur. Quò fit, vt in omni elixatione, duo sint perpetua. Primùm est, vt humor rei elixatæ extraneus, à centro ad circumferentiam, hoc est, ex re solida elixata, in liquorem elixantem trahatur: Alterùm, vt non modò humor ille attractus, terminetur ad alium substantiæ modum, ac qualitates sæpè, virtutesquè proprias amittat, & fiat ex tenui crassus, ex acerbo dulcis, &c. verumetiam vt internum, quod permanet, humidum crassius fiat, & sicco arctiùs permisceatur. Ex hac definitione Aristotelica, non erit solummodò facilè, elixationem à destillatione, infusione, affatione, maturatione, & aliis omnibus medicamenti, alimentiquè parandi, ac subigendi modis, secernere: verumetiam explicare, qua ratione, veteres, concoctionem ventriculi, elixationi similem esse, dixerunt. Nam, vt elixatio

elixatio, concoctio quædam, imperfecta licet, existit: ita etiam, & quæ in ventriculo fit ciborum confectio, concoctio est, perfecta tamen. Præterea, quemadmodum, elixatio fit à calore humido, ita concoctio, quæ in ventriculo est, à calore innato, & proprio ipsius ventriculi, qui humidus est, cietur. Ita tamen, ut elixatio, non sit futura plena & perfecta, citrà potulentum liquorem, qui facit, ut cibus coctionem potius, quàm coinquinationem patiatur, aut (quod Galenus enucleatius dicit) elixatus potius censcatur, quàm tostus. Omitto alia, quæ ex hac definitione possunt elici, vel, quia puto tibi iam factum esse satis, vel, quia nolo ab incæpta disceptatione longiùs abire. Fac ergò, redeat tua ad priores carceres oratio.

D i s c. Ostendisti qua ratione fiat elixatio, qua, concoctio ventriculi elixationi fiet similis. Illud nunc exprome, si concoctionem ventriculi elixationi vis esse similem, cur, quæ per elixationem

exre aliqua eliciuntur, non eadem se ratione habeant, qua, quæ per concoctionem ventriculi perficiuntur?

P R Æ C. Illud non erit explicatu difficile, si intelligas, aliam esse orationem, dicentis, res aliquas esse inter similes, aliam, dicentis, esse easdem. Nam quæ similes sunt, conueniunt illæ quidem alibi, dissident alibi: quæ autem eadem, omnia debent esse pares. Examinemus tamen (si lubet) has, quas putas effectorum dissidentes rationes, &, quid habent, ad infirmendam nostram assertionem, momenti, videamus.

D I S C. Inprimis, qui, per elixationem, exre aliqua, humor elicitur, heterogeneus est: Chylus verò, qui per concoctionem ventriculi, homogeneous. Præterea, chylus, est mixta, perfecta; substantia, induta formam nouam, tam diuersam à forma corporum, ex quibus est compositus, vt diuersum ens per se constituat, in prædicamento substantiæ: at natura liquoris, qui exre elixa educitur,
non

non differt, à natura illius, quod coquitur, nequè etiam res elixa alia est, quàm fuit, antequàm elixatur, aut dum elixatur.

P R Æ C. Satis respondero hîc, si nihil respondero, cum tu fanè nihil adferas ad rhombum; quia tamen non rectè vilus es intelligere, quæ superiùs de coctione & elixatione dixi, cogor eadem rursum repetere. Elixatio, vt ordiar ab ouo, duo tantum in se continet, vnum, liquoris ex re elixa per humorem calidum extractionem, alterum, liquoris, hinc extracti, iadè insiti, finitionem, & quasi dominationem. Hæc duo ita sunt de elixationis ratione, vt si absint, elixatio absit, si adsint, adsit elixatio. Id verò quod elicatur, siuè homogeneū sit, vel heterogeneousum, siuè nouam formam induat, vel veterem retineat, siuè albescat, vel nigrescat, siuè aqueum sit, vel aereum, &c. ad elixationis rationem non omnino spectat. De chylo igitur homogeneo quod obijcis, & de noua forma inducta, istud ab elixatione

ne non est, sed à coctione, quæ (vt superius dixi) non modò liquat & liquorem eductum insitumquè incrassat & finit, qua parte fateor elixationi similem, sed rem etiã, ex specie imperfectiori, in perfectiorem speciem, quasi filo educit.

D I S C. Ænigmata sunt hæc, & mera mysteria. Dixisti antea concoctionem ventriculi, esse elixationi similem, elixationem verò, ex Galeni sententia, esse concoctionem: nunc verò conuersa oratione, ita implicas, non explicas rem totam, vt ne Apollo quidem aut Oedipus, me expediam, huius Ænigmatis inuolucro.

P R Æ C. At ego te expedio, idq; verbulo vno. Dixi concoctionem ventriculi esse elixationi similem, vt intelligas, nihil esse in elixatione, quod, non secundum quandam analogiam, in ventriculi concoctione reperiatur, nam, ventriculus dum concoquit, elixat, hoc est, per humorem calidum, exprimit humorem è re elixata, expressumq; tandem finit, &
termino

termino includit, duabus enim, conditionibus illis elixationem definiui. At concoctio vltèriùs progressa, inducit nouam formam, aliaquè multa facit, quæ, elixationis non possunt vllò modo censeri. At, cur (inquis) elixatio ab Aristotele dicitur concoctio? Aristoteles, vt omnia complecteretur, duplicem posuit concoctionem, perfectam hanc, illam imperfectam. Imperfectam, vocat assationem, elixationem, & suppurationem, scilicet, quòd quam coquunt rem, non perducant ad perfectiorem speciem, sed ad alium tantum substantiæ modum, modus autem (quod nosti) non mutat essentiam. Neq; tamen, quod dixerunt veteres, coctionem esse similem elixationi, est omnino falsum, quia similem dixerunt, non eandem.

D I S C. Elixationis naturam, atquè rationem iam videor totam assequutus, argumentum igitur iam alterum, quod pugnat, concoctionem ventriculi à calore non fieri, videamus an expugnet.

pugnet. Argumenti summa hæc est. Si calor magnam insitamquè vim adferret, ad concoctionem ventriculi, sequeretur, in toto vbiquè corpore, & in singulis separatim partibus cibum posse concoqui, imo in iccore, venis, arteriis, præsertim verò in corde, aptius concoqueretur, quàm in ventriculo, Rationem peto ex medicis, qui ventriculum sentiunt, & consentiunt omnes, calorem suum mutuari, partim ab hepate, tanquàm vas igni superpositum ab igne, partim à corde, perenni illo & perpetuo naturalis caloris fonte, nec sanè absquè causâ: cor enim ut dicitur vulgò, sic verè est; caloris fons. Cum igitur cor & hepar, concoctionis, quæ ventriculi est, sint causa, debent certè illa cibos concoquere, cò magis, quò est maior illorum, quàm ventriculi, calor: hoc tamen non ita se habere, statuerunt & defigunt omnes, qui benè sunt in Physicis versati. Trita enim sententia est, quòd ventriculus quidem, sua ipse vi possit concoquere, quantum alimenti est
fatis

fatis toti nutriendo corpori, tamen, si alimentum ventriculus non benè concoxerit, sanguis, qui ex vitio labeq; concoctionis fluet, inficietur huius concoctionis tabe, eò foedior, quò peior in ventriculo concoctio. Istud eousquè est verum, ut qui in corde, hepate, aut toto corpore, totus calor manat, minimam, primæ concoctionis labem, sordemque non possit corrigere, ne dum tollere & penitus abstergere. Hinc fit illa orationis summa, calorem, nullo modo esse, concoctionis, quæ in ventriculo est, causam.

PRÆC. Mallem te substrictum, quàm fuso hoc & perpetuo orationis ductu expatiantem. Verùm nè videar philosophum velle, Rhetorem cōtemnere, quos conglobasti errores, & vno hoc confusæ orationis fasce, constrinxisti, eos ego facile euoluo omnes. Principiò, vētriculum accipere suum à iecore calorem, est oppidò quàm falsum. Ut cæteris partibus, sic ventriculo natura calorem suum indidit & inseuit. Nec facile istud negaueris, nisi

C

velis,

velis, testimoniorum multitudine, tanquam grandine, obrui, hic tamen calor augetur quodammodo, calore adiacentium partium, iecoris, nimirum, lienis, cordis, &c. Deindè, ventriculus non ideo lebeti similis esse dicitur, quòd, uti lebes, nihil caloris obtinet, nisi à subiectu ignis, ita, ventriculus, nullum calorem habeat, nisi à iecore: sed quia, quemadmodum lebes, res multas complectitur elixandas, ita, ventriculus, multorum ciborum coctioni, elixationique destinatur, &, quemadmodum lebes calorem accipit ab igne, ita, ab hepate, corde, liene, tanquam quibusdam focus circumpositis, ventriculus calorem mutuatur, licet nō ut ille totum. Nam si velis, ventriculi cum lebate, parē omninò rationem: ut lebeti ignem, ita ventriculo subijce hepar, istud est euertere naturæ fabricam, quæ fecit, non ut ventriculo iecur subiiciatur, sed contrà, quasi insideat summam ventriculi partē, Prætereà, ventriculus viuit, habet ergò in se calorem, (vita enim calore cōtinetur) se-

cus

cus de lebe, experte scilicet vitæ, quia caloris. Sed cogitatione, quæso, atque animo fingas, leberē sua natura calidum. An ideo desinet esse lebes, quia est natura calidus? haud facile crediderim. Sit igitur ventriculus, quasi lebes natura sua calidus, similis, quod teneat, & coquat: cetera dissimilis. Est hic error haud exiguus, quem argumenti tui tegumēto, tam subtiliter inuoluisti, ut hominis nō acriter videns, acie facile subterfugisset. Cor dicis esse caloris naturalis fontem, verē tu quidē, si verē sentias. Ut verē sentias, cogita cum medicis, duos calores, eosque singulos naturales, hunc influentē à corde, illum quibusque partibus insitum. Quare, quod sumis in argumento, calorem qui in corde nascitur, perficere coctionem, falsum id est. Hæc enim functio, est propria caloris, qui ventriculo est insitus. Cui (inquis) rei, influens calor? ut insito veniat subsidiarius, & cum debiliior est, quasi ad supplementum. Influens autem dicitur, quod ex

corde influat, subsidiarius insito calori, quem vnaqueque pars corporis suum habet & proprium: ita vt influens dicatur, non quâ insidet in corde, sed quâ ex corde emanat, subsidio alijs partibus. Argumentum ergò tuum, probat, calorem cordis, quem influentem diximus, esse coctioni, vt alijs aliarum partium functionibus, adiutorem, non authorem. Quid premis de calore adiutore? cum nos contendamus de authore? fallis profectò, & pro alijs obtrudis nobis cepas. Error dein est, quòd cor & hepar dixeris esse cōcoctionis ventriculi causas. Galenus, vt omnia, prudenter dicit, particulas animalis, suam quamquē edere actionem, nequē opus esse, vt actio, huius propria, per aliam partē, tanquā instrumentum, conficiatur. Si vnā concesseris partem, esse alteri instrumentum, ad edendam functionem suam: illius quæ edit, functio iam non dicetur propria, sed huic cum illa communis. Quare, cum chylicatio, sit propria ventriculi actio, erit in ipso ventriculo, chylicatio-
nis

nis causa propria. Nequerefert, quòd cor, hepar, reliquæ partes, ventriculo veniant adiumento, conficitur indè, esse has, causas, non principes, sed adiutrices, quod supra clarissimè differui. Hactenus tui argumenti partes singulas tentavi, tota compago quid habeat firmi, aut potius infirmi, videbis clarius, si explicuero, cur coctionis causa, in ventriculo, sit calor minor, maior autem in alijs partibus nō sit.

D I S C. Putabam, te quærere potius, quàm inuenire exitum rei: verum, si istud explices, vrgebis ipsius difficultatis vestigium.

P R Æ C. Facile istud explico, & clarè, per similitudinem. Animæ, & caloris natiui, haud dissimilis est ratio. Noli hic tetgiuersari. Nam, cum calor natiuus, animæ, in edendis functionibus, sit proximum instrumentum, ratio vult, & natura sanè præscribit, vt ille, propiùs vim animæ exprimat & repræsentet, quàm quicquid est in rebus aliud. Vide iam quid consentiant. Anima tota est in to-

to corpore, & in singulis partibus tota, tamen, non omnem, in omni parte, actionē, sed in singulis partibus, exerit & exercet singulas: ad hanc formam, calor natiuus, per omnem corporis partem fusus, non omnem in omni parte functionem obit, perge verò. Anima, ad aliam atque aliam actionem, alia atque alia vtitur facultate, hac ad aspectum, illa ad auditionem, alia ad gustationem: sic calor, quasi facultatum varietatem hanc imitatus, vt varius agit, sic varius dicitur, in aure auditorius, in oculo visorius, in hepate sanguificus, & in ventriculo chylicus. Si quæras, cur, anima aut calor, non æquè in omnibus partibus omnem functionem obcant? Respōdeo cum omnibus, siue medicis, siue philosophis, ex temperatione & conformatione id esse partium. Hæc huic, illa verò pars, aptior est illi functioni, quòd hæc hanc, illa habeat illam temperaturam & conformationem. Temperiem, intelligo, analogiam elementorum, non hanc modò patentem, sed laten-

latentem etiam illam, quæ recondita dicitur, & puncti. *Hæc* (teste Galeno) *facit, ut qualibet animalis pars, edat actionem, ab aliarum partium actionibus, tam diuersam, quàm sunt, ipse inter se, partes diuersæ.* Conformationem autem dico, concinnitatem eam, quæ ex sua cuiusquæ figura, multitudine, magnitudine, positu, & cum alijs copulatione, emicat. His itaq; diligenter à te cōsideratis, ut in alijs partibus, sic in ventriculo, haud difficulter & ipse intelliges, & alijs demonstrabis, quæ ratione, non modò solus ventriculus chylum faciat, solum hepar, sanguinem, sed quæ etiam, aliæ corporis particule, singulæ singulas edant actiones. Facile etiam reddes rationem, cur, nec errores in prima cōtione commissi, à secunda, nec in secunda, à tertia, corrigi possint. Quod aliundè sanè non euenit, quàm à partis constitutione, quæ conditiones ac proprietates ita vni parti adfigit, ut alteri impertiri non possint.

DISC. Placent, quæ dicis, si paulò

tantum clarius, dicas de occultis temperaturis, quas multi non admittunt, nonnulli certè irrident.

PRÆC. Imperitus est, qui non admittit, stultus, qui irridet. Verum, quia fusior est ea tractatio, quam ut à nobis possit absolui paucis, in aliud ipsam tempus rejiciendam puto. Perge tu modò qua coepisti via.

3. DISC. Consensio est omniū, qui quidem in philosophicis aut medicis nomē habent, concoctionem, aut omninò, aut maximè, in fundo ventriculi fieri, fundus autem ventriculi, caliditatē nullam habet, plenus ille frigida & limosa substantia, quæ membranis adhærescit. In superiori ventriculi parte (quæ est cordi, hepatri, lieni & diaphragmati vicinior) maior reperitur caliditas. Hinc liquidò quàm apparet, non calorem, sed aliud, esse coctionis seu chylicationis causam, nisi fortè contrà omnes, statuas, chylum in superiori ventriculi parte, & nō inferiori, fieri, nam ibi est caliditas, hīc frigiditas & limositas.

PRÆC.

P R A E C. In fundo ventriculi, verè tu dicis concoctionem fieri, quid tùm po- steà? Frigidus, inquis, est. Hic te volo præ- sentem, aliud enim est, fieri concoctio- nem in ventriculi fundo, aliud à fundo. In fundo fit, quia alimentum in ore pa- ratum, & mollitum, non quiescit, donec ad fundum venerit. Hic concoquitur, quia quiescit, vel certè dum quiescit. Sed estnè, excipis, ventriculi fundus frigidus? Minimè, habet enim eandem cum reli- quo ventriculo substantiam, estque par fundi & reliqui ventriculi conditio, imò carnosior cum sit quàm reliquus ventri- culus, calore videtur instructior, vndè, non tantùm in ipso, sed ab ipso etiam, fit concoctio, licet non tota. Cum primùm enim cibus, fundum insederit, cum sta- tim ventriculus, totus totum complecti- tur, & omni ex parte, supera, infera, tan- quàm fascia, pressissimè cōstringit, vt ipsi circumijci & omninò adhærescere videa- tur. Nihil in ventriculo puta inane, si ta- men conuenienter sese habeat, & secun-

dum naturam. Pōnis inane? Cibus tunc in tanta capacitate, hūc illūc fluitans, nec lateribus ventriculi arctatus, concoqui sanè non potest. Hinc, siue parum, siue multū, ventriculo continetur, eius semper sinus plenus apparet, tunicaq; , quos continent cibos, arctè complectuntur: Id quod in vtero, in vesica, in alijs corporis cauis etiam vsuuenit. Cum igitur, non minus concoctio, quàm alia actio omnis fiat per contactum, cibuscq; , æquè à fundo, ac ab alijs ventriculi partibus, contingatur, ab ipso etiam ventriculi fundo, ratione caliditatis, quam habet, concoctionem, in parte, absolui negemus? Ad partes circumiectas quod spectat, dico, eas esse ita aptè positas, & dispositas, vt non vnus magis quàm alterius ventriculi partis, ipsiusq; adeò totius, calorem innatum foueant, & conseruent. Nam vt ventriculi parti dextræ, superiori, anterioriq; iecur incubat, ita parti sinistræ lien, inferiori, adiposum omentum adhærescit, posteriori insternuntur, vena caua, arteria

ria magna, pancreas, atq; arteriarum tandem propagines, à corde exeuntes, ventriculi omni parti intexuntur, &c. Frigida illa & limosa substantia, quam fundo ventriculi affingis, & ipsius membranis adnasci affirmas, aut nihil est, aut crusta sola est, quæ, ex excrementis tertiæ concoctionis ipsius ventriculi genita, non solum obsidet fundum, sed totum interio-rem ventriculum obambit. Hanc, siue limi, aut fimi nomine censeas, siue frigidā aut calidam dicas, nostra nihil interest, sua enim, neq; qualitate, neque substantia, concoctionē aut promouet, aut prohibet. Cui ergò vsui crusta illa? Impedit (quod rei anatomicæ peritissimi aduerterunt) ne ex frequenti, potuum & ciborum, quos sæpe dimittimus duriores, ad hæsu, interior ventriculi tunica, vel vl-cere, vel callo, obducatur. Illa enim, si frigida est, prius, quàm calor ventriculi ad cibos pertingit, incalescat, necesse est. Quod si præter crustā hanc aliud quidpi-am in ventriculo existit, ventriculus quidē non rectè se habebit. (Nec

Nec obstat, quòd, in hominis mortui ventriculo, humor fortassè aliquis, pituita non absimilis, inueniatur, quia vbi vita excidit, concidunt mox omnia, spiritus densantur, densati in aquam exeunt, aliaq; multa fiunt, quæ corpori vigenti, & viuenti, nec accidere possunt, nec adfingi debent.

D I S C. Beasti me certè, qui res alioqui difficillimas ita neruosè & clarè distinguis, cauebo igitur posthac, ne faceßsam tibi, qui me beas, molestiam non necessariam, & substringam propterea, quæ reliqua sunt argumenta, in formæ pressioris quendam quasi modum. Quid teteneo?

4. Necto hoc modo. Si, concoctionis in ventriculo, causa sit calor, maiorem calorem, melior consequetur concoctio. Explodo cum qui hoc concedat. Vident enim, qui rectè vident, quo maiorẽ ventriculi, iecoris, aut reliqui corporis calorem, eo concoctionem lentiores & fœdiorem.

P R Æ C. Concoctionem à calore perfici

fici cum dicimus, calorem intelligimus, non quemcunq; , sed naturalem, temperatum, & cuiusvis partis proprium. Hinc Aristoteles coctionem definit, perfectiorem ex oppositis passivis, à naturali & proprio calido, & Galenus ubiq; inculcat, à moderato calore, omnem coctionem perfici, ipsamq; per moderatè calida, vel medicamenta, vel balnea, vel fomenta iuvare. Calor namq; est coctionis author, non quidem quā calor, sed quā moderatus. Moderatus, alius alijs hominibus, alius alijs eiusdem corporis partibus, ità, vt calor hic quandam obtinear (vt loquuntur medici) latitudinem, quam si egrediatur, fiatq; maior: tantum abest, vt perfectioris, vel coctionis, vel alterius actionis, sit causa, vt porius, quæ contingit omnia, deprauet & inficiat, intrà autem limites & cancellos suos si consistat, quò magis ad symmetriam accedit, eò melius agit & perfectius.

D I S C. Video, quid dicis. Id tandem expedi mihi, quid inter calorem absolutè dictum

dictum interfit, & illum, quem tu vocas naturalem.

P R Æ C. Calor naturalis, dupliciter ab altero distinguitur. Primùm, hic, cum siccitate, vel humiditate, potest æquè coniungi: ille, semper insita vi sua humescit. Nam cum caloris naturalis munere, corpus alioqui frigidum, quantum est concalescat: necesse est, vim ei inesse calfaciendi valentissimam, quæ si pariter siccitatem comitem haberet, nos impendiò adureret, non vrit autem, necesse igitur est, humoris temperatione perfudi.

D I S C. Humor igitur iste, de quo loqueris, ingrediturnè propriam caloris naturalis rationem, ità, vt si absit illa, hic necessariò corrumpatur?

P R Æ C. Omnino. Nequè enim, sine humiditate, calor naturalis esse aut cogitari potest, vndè Aristoteles *inest* (inquit) *in semine omnium, aliquid, quod facit, vt fecunda sint semina, videlicet calor, isq; non ignis non talis facultas aliqua est, sed spiritus, qui in semine, spumosoq; corpore continetur. Galenus quoq; substantia, ait, caloris innati aerea est, et*

aqua. Id quòd sensisse videtur etià Hypp.
dum, in aphorismis, infantes, dicit, plurimum
habere caloris innati, non alia quidem de
causa, quàm quòd substantiæ aquosæ &
aeræ, (quæ innati calidi propria existit)
plurimum obtineant.

D I S C. Mira hæc possunt nè esse vera?
Si enim calor naturalis humiditatē sem-
per habeat adiunctam, cur non putas pu-
tredinis potius causam, quàm coctionis?

P R Æ C. Cum Arist. & alij, calorem
humiditati coniunctum, asserunt esse pu-
tredinis authorem, illi calidum humo-
rem intelligunt, immoderatum, exter-
neq; adscitum, non autem hunc mode-
ratum, quem innatum, & naturalem ap-
pellamus. Etenim si natura quæ, cuius rei
indidit, sui conseruandæ vehementē mo-
tum, calorem, sui vastatorē etiam inspar-
sisset, non matrem sanè illā, sed nouercā,
eamq; stultissimarū absurdissimā, & ab-
surdissimarum stultissimam, appellarē.

D I S C. Acquiesco hîc, sed quòd dixe-
ras, aliud esse inter duos istos calores dis-
crimen, iste me scrupulus adhuc exercet.

P R Æ C. Quare exercet? Vide rem claram. Calor absolutè dictus sola est qualitas: at calor naturalis (vr pluribus in locis Galenus docet) non est pura qualitas, sed substantia quædam calida, quæ causa est, vt appelletur, non caliditas, aut calor, sed calidum naturale, cuius nominis cōplexu, non solum calorem, sed etiam subiectum illius inclusum vides. Quia verò subiectum, est corpus, de prædicamēto substantiæ, spiritus nimirum, ideò naturalis hic calor, interdum connatum corpus, nonnunquàm autem, natiuus spiritus, appellatur. Idem namq; est, spiritus calore quodam perfusus, & calor idoneo conuenienti q; humido cōtent9, quod illius subiectū est, & indissolubilis materia.

D I S C. Clara sunt, quæ dixisti omnia, ijs tamen ne omninò assentiar, facit mos à nostris practicis receptus, qui, tam in calida, quàm in frigida ventriculi intemperie, Piper, Zinziber, Galangam, Garryophyllon, aliaq; cum simplicia, tum composita, quæ igneo & extraneo calore pol-

lent,

lent, agris præscribunt : quòd sanè aut non facerent, aut facere non deberent, si quæ dixisti, vera sint. Nosti, quàm periculosa, ne dicam, perniciosa res sit, si calor naturalis, non modò non refrænetur, sed vno maximùm gradu intendatur. Nosti præterea, Nicholaum Taurellum, ex Rondeletio referre, calorem aromaticis istis nonnunquàm extinguì. Dicit autem Rondeletius, *puellas non paucas, in frigidam ventriculi intemperiem incidisse, quòd (vt pallorem sibi concilient) Zinzibere frequentius essent vsæ.* Recte nè an læcis nostri practici faciant, tu me doce verbulo. Nam si illi benè faciant, malè tu quidem dicis, & doces.

P R Æ C. Non adducar, vt credam, vllum ex ijs, qui medicinam faciunt, adeò esse imperitum, vt nesciat, medicamenta esse, quæ commemoras. A medicamentis, corpus alterari & affici, quis tandem ex plebe ignorat? Alterationem, esse mutationem, ex vna qualitate in aliam, latere Philosophum, non potest. Eam
D qui

qui corpori non ægro adhibet, carnifex est, non medicus, adhibet autem medicus, si medicus, per contraria. Contrà igitur Philosophiæ, & medicinæ normam facit, qui, ventriculo benè habenti, quæ dicis, adhibet, sunt namq; illa, vt ventriculo ægro remedia, sic sano venena. Neq; solum sanum priuo his medicinis, sed omnem etiam ægrum, nisi cui ægrè est ex frigiditate, aut sola, aut humiditati cõiuncta. Quod tu etiam ipse facillimè cognoscēs, si illorum, qui praxim medicam literis tradiderunt, monumenta diligenter euoluas, quæ morbis & partibus, suam cuiq; medicinam scribunt, & præscribunt, vt quod illi huic disijciendo morbo statuunt, alteri tu ineptè adhibueris.

D I S C. Tu quidem, cum paucis distinguis ista, sed medicorum vulgus, ventriculo, calido, frigido, obtrudit promiscuè omnia, quæ dixi.

P R Æ C. Quid hic erroris demum putas? Homines, in frigidam quàm calidā, in humidam quàm siccam, ventriculi in-
temperi-

temperiem, sæpius incidunt, nihil vt sit miri, si medici sæpius his, quàm alijs vtantur medicinis. Quarè, nō est, quòd medicos aut calumnieris proptereà, aut vituperes. Non enim Rondeletius, Taurellus, & alij viri doctissimi, medicamentorum vsum moderatum & conuenientem, sed intempestiuum & importunum potius ipsorum abusum, insectati sunt.

D I S C. Hæc non dico, vt insecter, sed confector, vt capiam, quid peccant, si fortè peccant, isti, qui medicinis prædictis, sic siuè vtuntur, siuè abutuntur, vt Zinziber integrum, & in sua substantia, obijciant facilè, Zinziberi infuso in haustu, maximè sudorifero, grauissimè interdicunt.

P R Æ C. Rectè quidem illi, hoc prohibent, illud præcipiunt. Nam quæ sudorē euocant, calida, non potenter calida esse debent, Zinziber autem (teste Ægineta) potenter calfacit ipsum per se, potentiùs verò si maceretur, cum maceratio subtilissimam exprimat, tenuissimamquè

eius vim, quæ & citius penetrat & impensius calfacit, contrà, in tota simul substantia, pars crassior tenuiori permixta, illius actionem retundit & infringit. Hinc medici, cum Sena, Agarico, Turbith, & alijs medicinis Catharticis, Zinziber infundunt, vt quæ imbecillæ, ignauæ, ac pigræ sunt ipsæ in se, huius permixtione excitentur, & vt, quæ crassioris materiæ res, suo pressæ pondere, in vno facilè loco hærent, Zinziberis tenui acriq; vi altius in corpus longiusq; propellantur. Verùm hæc ad institutam à nobis disputationē, aut omninò nihil, aut parùm facere videtur. Quare vrgeamus, si placet, rem nostram: mittamus alienam.

- DISC. Placet, quia id tibi placere video, purga modò mihi aures tuas, non arrige tantùm: premo certè. Calor hanc habet naturam, vt humorem omnem imbuat colore, aut nigro, aut alio, qui ad nigrum accedit proximè, pro ratione humoris, hoc aut illo modo affecti. In vrinis vide istud, quas ex aqua egressas cruda,
- nunc

nunc flauas, nunc rubeas, sæpè subnigras, aliquandò nigras, aut alio colore foedas, alius atq; alius calor efficit. Sed in cōcoctione ventriculi, contrarium vsuuenit. Cibi enim, etsi natura ipsi sua, nigro, vel alio colore sunt, à ventriculo tamen tracti & tacti, albescunt, eò magis, quò concoctio est melior. Calor ergò cum chylo, & chylus cum calore, nihil planè commercij habebit.

P R Æ C. Quod schola vsurpat, falsum non posse nisi falso probari, id in tuo iam argumentovideo verissimum. Quicquid enim dicis, id vel falsum est, vel falso nititur. Calorem vis tinctorem esse rerum. Quid? calorem ex colore, aut colorem ex calore colligis? Ineptè, ne dicam grauius. Nam color calorem aut semper, aut nunquam sanè prodit. Pone mihi ob oculos, salem & niuem, vtrumq; album, cur non vtrumq; frigidum? Vide mihi postea picem & opium, vtrumq; nigrum, cur non vtrumq; calidum? Despice nunc (sequar te omni via) duas rosas, hanc albam, illam,

lam, rubram, & si tu verè, hanc calidam, illam frigidam: Sed omnes omnem rosam ponunt frigidam. Quare cum non euadis, vt te non statuan falsò dicere: id saltem vita, vt te non dicam pertinaciter sentire. At de vrinis, rogas quid censeam, & qui censeam? planè quod de alijs, ijs calorem non addere colorem. Putas tu, aquam puram putam, esse materiem vrinæ. At aqua puta pura, quicquid bullit ab igne, nunquam suum colorem amittit. Externum fortassè istud. In febribus, hoc est, in flamma coloris, vide vrinas ipsas, quâ albas, quâ aqueas, nulloq; colore tinctas. At chylo vnde color? certè nec à frigore, nec à calore. Id te docceo non meis sed Petri Hispani, doctissimi viri, verbis. *Prior, (inquit ille) causa est, quia prima digestio, est materialis ad omnes alias digestiones, cum præparet ipsis materiam: similiter color albus, est color materialis, ad omnes alios colores. Propter hoc habuit chylus album colorem. Altera causa est, à parte causa efficientis, quoniam chylus generatur in stomacho,*

Romacho, qui est albus, & generans derelinquit vestigium suum in re generata. Sic hepar rubificat quia est rubeum, &c. Ex quibus ipsius verbis & ijs quæ superius diximus, vides, quàm nihil concludat argumentum hoc tuum, quia tamen hac non non successit, alia si velis experiare via.

D I S C. Scrobem huic viæ video re- 6.
motam, at spinæ in alia via me pungunt,
& tribuli. Homo, rerum quas Deus molitus est, omnium est temperatissimus, alitur ergò temperatissimo. Nam quæ excedunt qualitatibus, medicamenta sunt, non alimenta. Sed ex cibo, in ventriculi sede cocto à calore, non potest chylus ita temperari, vt calor calori non addatur (quòd enim calore perficitur, necessariò calidius fieri debet) At in prima coctione, cibus fit ipse se calidior, in secunda ergò coctione, & tertia, fiet calidissimus. Calidissimum & temperatissimum nemo dixerit: aut si tu fortè dicas, prome nobis, qua vi & via, ex cibo intemperatissimo

simo, sanguis temperatissimus, aut temperata caro gignitur.

PRÆC. De homine temperatissimo, & eius temperatissimo alimento, verè tu quidem, sed non ad rem. Non enim mox est alimentum, quia cibus. Cibus sumitur, fit alimentum: ita ut cibus non sit alimentum, nisi subactionis & temperationis quadam quasi manu fiat. At finge cibum temperatissimum, non subactu corporis, sed naturæ sponte. Frustrà fingis, quod nec natura vult, nec ars potest facere: aut extrà corpus si fieret, corpus, quas ad mutationem cibi in alimentum adfert, vires & vices non subiret.

DISC. Quid narras? Cibus non vis esse alimentum? certè contra communem & sentiendi & loquendi morem vis. Omnes enim cibum dicunt putantquè alimentum.

PRÆC. Non malè dicunt, non malè putant, sed ex sensis veris, tu saltò colligis. Alimentum, tria significat, cibum, sanguinem, & id, quod rei alendæ appositum,

situm, aut iam actu alit, aut proximè alet. Hinc Hyppocrates & *futurum alimentum*, & *veluti alimentum*, & *verè alimentum* dicit. Quod dicit alimentum verè, id verè temperatissimum, & naturæ humanæ proximum. Malè putas huius ordinis esse, aut cibum, aut molem sanguineam, hoc est, humorem venis inclusum. Quod medici omnes sermone vsurpant, & tu sumpsisti tuæ rationis firmamentū, scilicet, alimentum debere esse temperatissimum, innuunt illi, & cape tu, de verè alimento, non de cibo, futuro alimento, nec de humore venis incluso, veluti alimento, vides iam, te fingere ad promptam, non ad victoriam pugnare.

DISC. Putabam hoc argumenti esse adamas, video paleam. Quòd si reliquas rationes spiritu quasi vno difflaucris, ego quidem nouæ doctrinæ, ad libellam non benè examinatæ, nunquàm postea credidero. Sed vide, quæso, alteram vim, 7. si tamē in palea posset esse vis. Potest homo sine calidi fotu, ætatem exigere, sine

frigido alimēto non potest. Nā potus minimum frigidus esse debet: immò calidus omninò esse nō potest. Quare si calor coqueret, potus coctioni officit, quia calori frigus aduersatur maximè. Infans certè vix sibi psuaserit, naturā posse & velle carere foris calido sibi cōgruentissimo, nolle nec posse carere potu frigido, caloris peste, si qua aliqua, tabe què pessima.

PRÆC. Cibus dupliciter dicitur calidus, actu, potestate. Actū calidum nullū putā à natura, sed à vi caloris externa, qui tactus statim calefacit: Calidū potestate intellige, natura talē, qui pressus calfacit. Non enim aut penitus, aut prius exerit suā vim, quā pressus & quasi patiens. Iam hominem posse, totā ætatē, carere cibo potestate calido, contrā morem est, contrā rationem, contrā Galenū, mos notus barbaris, rationē, & Galenū, ipse Galenus exprimit, his verbis. *Omne animal conuenienti sibi nutritur alimēto: conueniens autem cuiq; animali est, quicqd assimilari corpori, quod nutritur, potest. Oportet igitur toti nutriētis substantiæ cum to-*
ta nu-

ta nutriti natura communio aliqua similitudoq;
sit prorsus, cibi aut, qui uti assimilentur, & cor-
pus nutriant, spatio egent, ij frigus vniuersi po-
tius, quàm calorē afferre in præsenti videntur:
ceterùm calefaciunt hi quoq; tandem, non secus
ac reliq; cibi, si semel ut corpus nutriāt, sint con-
sequuti. Et paulò post. Omne (inquit) nutri-
mentum, quatenus nutrimentū est, animalis ca-
lorē auget. Claram hic habes Galeni sentē-
tiam, præclara sanè ratione firmatā. Nolo
mihi obijcias, lactucā, portulacā, alios ci-
bos actu potestateq; frigidos, illos, scilicet,
partim alentes, partim medicātes. Frige-
rant quidē hi, sed dum coquūtur: at cocti
iam, & in sanguinē versi calfaciūt. Frigida
calfaciūt? Non ipsa in se, sed facta alia, sci-
licet, sanguis & spiritus. Si id tantū pre-
mas, sine cibis actu calidis posse degi vitā,
cōcedo quidē, de vita anni vnus aut alte-
rius, non cōcedo de vita ætatis. Nā frigida
actu perpetuò sumpta, vereor, ne vētriculi
vim interiorē & debilitarent, & sensim ex-
haurirent. Quòd contendis potū nec de-
bere, nec posse esse calidū, hic certē non
solum

solùm perdis causam, sed & prodis insci-
tiam tuam. Iaponij te refellunt, perpetuo
aquæ calidæ potu, vigentes, dum calidè
bibunt, languentes, dum frigidè. Nequè
hoc legimus tantùm in Petri Maffei Indi-
cis historijs, sed vidimus, & stupuimus Eu-
ropæi, Romæ, reges Iaponios, æstate, hye-
me, è calida semper aqua non labellatim
gustantes, sed bucca plena haurientes. Ma-
gna facti ratio ab illis est, quòd viuant, vi-
geant què diutius, firmitus, quàm nos qui
frigidè bibimus. Nequè factò tantùm pro
se contendunt, sed etiam rationibus, cõ-
trà nos. Frigida (inquiunt) comprimunt
fibras, irritant tussim, & pectoris vitia, re-
stinguunt natiuos ignes: feruida, fouent
calorem insitum, laxant què meatus, & eò
faciliùs sitim leuant, &c. Sed sit, quod di-
cis, potus necessariò frigidus. Quid ad
nos? Si subiecerimus, id intelligendum,
de potu actu frigido, potestate calido, vi-
debistui dicti ludum potius, quàm verum
ictum. Potulenta, quibus vrimur, omnia,
vinum, ceruisia, pometum, melicratum,
& An-

& Anglorum Alla, sunt potestate calida, hæc magis, illa minus, quamuis prima occurrence refrigerent. Sed, quod hosti nollem, tibi largior, potum debere esse ipsissimam aquam, non solum actu, sed etiam potestate frigidam, non tamen vitæ victasquæ manûs tollo. Quicquid enim est ex aqua gelida vitij, id ventriculæ non offendet, si bona sit, & tempestiuè sumatur. Tempestiuè dico, in siti, quæ, Galeno teste, partim vrget, ob humoris inopiam, partim vrit, ob caloris copiam. Inopia humoris est, ex cibis calidis & siccis, qui certè in ordinem rediguntur aquæ frigidæ infusu. Caloris dein copiam, quæcunquæ demùm illa est, & ex quacunquæ re, aquæ gelidæ, vel minui haustu, vel temperari vi, vident, qui in natura quicquã vident. Explicauimus commodum aquæ tempestiuè haustæ. Requisiuimus etiam bonam, leuem, scilicet, & tenuem, vt quæ citò frigeat & caleat, faciliusq; à ventriculi calore patitur, quàm in ipsum agit. Ita Hyppo, sect. 5. Aph.
Aph.

Aph. 26. Age verò, in hoc sole cæcutis?

- DISC. Cæcus sim, si hîc cæcutiam, ita
 8. omnia obuia, & posita in medio: sed quid
 censes de hac dubitatione? Vix videtur in
 sani mentem cadere, naturam vel (vt di-
 cam aptius) nature parentem deum, effe-
 ctui organum, aut calido frigidum, aut
 frigido calidum præfiniisse, & nouè dici-
 mus, si dicamus, & ineptè sentimus, si ita
 sentiamus. Nam deus, qua est prouiden-
 tia, & potest & vult, efficere, vt effectis or-
 gana congruant, aptèquè ad vsum respō-
 deant. Si ergò coctio esset à calore, esset
 diuinæ prouidentia, ventriculum finxisse
 calidum. Sed ventriculum probo frigi-
 dum, quia exanguem & limosum. Si igitur
 fieri vis coctionē à calore, haud sanè
 naturaliter eā statues fieri in frigido loco.

PRÆC. De ventriculo frigido, erras,
 toto (quod aiunt) cœlo. Quod concedis
 reliquis partibus, cur neges ventriculo,
 calere? Si coniecturam hanc dicas, vide
 rationem ex medio ventriculo petitam.
 Principia ventriculi sunt semē & sanguis:

Prin-

Principia dico, quia ex semine, fila quædam, texturæ inter se specie conferta, nascuntur, quorum postea, sanguinis interiectu, spatia opplentur. Vbi quæ calor, in semine, in sanguine. De sanguine nulli dubium. De semine sic Aristoteles. *Semen copiosum in se continet calorem, qui igneus non est, sed spiritus, cuius natura proportionem respondet elemento stellarum.*

DISC. Negas igitur, cum vulgo medicorum, ventriculum esse frigidum? Ratio contra te est. Nam constat membranis, frigidis sanè, si medici quid in hoc genere sapiunt.

PRÆC. Tunicas, ex quibus ventriculus est aptus, rectè dicis membranas, non nudas tamen, sed carneas: sic enim medicorum principes affirmant. Constans est Galeni sententia, in compositis corporis partibus, quarum actio est propria, esse partem aliquam simplicem, actionis, quæ à composita parte exit, causam, cui in corpore nulla sit similis: sed ventriculus, est pars composita, actionē habēs propriam,

priam, cuius causa est ipsius substantia, quæ ex illis tunicis conficitur, ergò nō erit simplex membrana. Pone, quæso, membranam nudam, pones certè vnā in corpore multas partes ei similes. Maneat ergò membrana illa, quam dixi, carnea, calida, scilicet, & humida, calidam affirmat Ga-

*Lib. 2. lenus, cum dicit, propriam, ventriculi, intesti-
ni, & vesicæ vtriusquæ carnem, esse cute
cap. 30. calidiorem.* Humidā indicat, illius & molli-

ties, & vltus, quia est status elixationi quæ, vt suprà probauimus, nisi in humido, non fit. Ineptè ergò tu, qui deum huic controuersię interferis, eiusquæ, hac via, prouidentiam vocas in controuersiam. Satis tibi, deum finxisse, nequæ eget te, aut consiliario, aut disceptatore. Optimum est, quia fecit, nec tamen, quod probaui, fecit præter ordinem, præter rationem, præter proportionem, quæ si tu non perspexeris, vitium est tuæ tarditatis, nō diuinæ compaginationis.

Disc. Etsi videar è tuis verbis, eliciuisse veritatem: fumus tamen nescio quis ex altera

altera ratione obortus, veritatis flammam non totam sinit aperiri. Eccum tibi hunc 9. fumū. Citius decuplo concoquitur, quod est humidum & aqueum, quàm quod solidum & siccum: cum econtrà, si coctio esset à calore, fieri & decuit, & debuit. Magis siquidem calori infensa & infesta est, vis humida & aquea, quàm solida & sicca.

PRÆC. Hauris ex Hyppocrate, sed aquam sanè nō puram. *Facilius* (inquit ille) *est, impleri potu, quàm cibo.* Cur verò? Adferūt pleriquè verba tua, scilicet, quòd liquida citiùs quàm solida coquantur, ac in substantiam aliti vertantur, sed nō tuo sensu. Nam liquida intelligunt, vina crassa, iuscula, succos expressos, & huius generis materiam, liquentio rem quidem illam, & corpori nutriendo aptiorem. Signatè dico, liquentio rem, non aqueam. Nam aqua non nutrit, sed ducendis per viarum angustias cibis inseruit. De aqua igitur tace, aut dic, vndè istud hauris? Certè nec ex Hyppocratis, nec Galeni, nec rationis fonte: Isti enim illud intelligunt, de humidis alimētis, non de aquis humē-
E tibus,

ribus, quæ nihil faciunt ad nutritionem. Quod verò sumis, humidam hanc vim (alentem semper intelligo, non aqueam) infensiorē & infestiorē esse calori, ideoquē, si coctio sit caloris, difficilius debere à calore vinci, quàm solidam & siccam, oratio mihi videtur rustici, nō philosophi. Nam qui philosophiam primis labris degustarunt, nōrunt, actionem faciliore esse, inter symbola, quàm a symbola. At, vis humida magis est symbola siue agnata calori, quàm solida, caloris enim naturam supra terminauimus humido. Sed frustra tibi obijcio philosophiā, & philosophiæ axioma, non valdè, quantum video, versato in his spatijs. Ex experientia promā, quæ rusticos docet, res tenues & raras, facilius actionē caloris suscipere, quàm crassas & densas.

10 DISC. Video verum hīc fumum, sed explica mihi, in ista oratione, quid caliginis, aut lucis. Astaci, caneri, gambares, ostrea, cōchylia reliqua (pisces taceo) nullo calore, aut caloris specie, res concoquunt, quas homo, calore summo, non possit

sit aut soleat. Coctio ergò nō est à calore.

PRÆC. Pisces destitui omni calore, somnium est profectò tuum, non veritatis oraculum. Fernelium audi, quo nemo apud nos, aut dicit purius, aut (si discesseris ab opinionū nouitate) sentit præclarius, pronunciantem in hæc verba. *Hoc* (intellige, calore) *viuunt serpentes, quos tamen frigidos cōmemorant: hoc viuunt papauer, mandragora. Itaque non perfectiora tantum animalia, sed & muscæ, & vermes, & vniuersum insectorū genus, quinetiam, ostrea, & conchyliæ, & spongia, & quæ inter frutices & animalia ambigunt (Zoophyta Græcis appellantur, plantanines à quibusdam dici cœperūt) calore hoc perfunduntur.* Aristoteles præiuit hanc viam. *Omne* (inquit) *quod viuunt, calidum est, & humidum (vita enim calido & humido continetur) frigidum verò & siccum, quod moritur.* At quid ad Aticennam, qui, pisces vniuersè omnes, vult esse frigidos? Et ego quoque volo cum illo pisces frigidos, non absolutè, sed comparatè, non positivè, sed priuatiuè. Comparatè dico frigidos, collatos cum sanguineis, priuatiuè frigidos, quasi non

plenè calidos. Quod verò sumis, conchy-
lia, &, quæ suprà comprehendisti, alia, cō-
quoquere res, quas nemo hominum po-
test, melius dixisses, quas nemo hominū
vult. Potest fortassè homo, æquè ac con-
chylia, illas res concoquere: sed auersatur
illas, partim venenatas, partim fœdas,
partim palato humano non satis congru-
entes. Deindè, non quidlibet ex quolibet
alitur, sed ex eo quodlibet, ex quo gigni-
tur, vermes ex cæno, conchylia ex salina-
rio lentore, ostrea, ex putri limo aut spu-
ma, reliqua ex reliquis agnatis cibis. Im-
peritè igitur tribuis calori, quod est alteri-
us rei vitium. Homo enim non abstinet
ab illis rebus, quasi non possent cōcoqui,
sed quòd cōcoctæ, succi, vel prauitate, vel
venenositate, hominem inficiant & con-
ficiant. Haftenùs, ex materia concoquen-
da, ostendimus, nihil in tua oratione esse
firmitatis, at maiorem iam colligo cōtrā
te vim, ex calore concoquente, sic, vt si de-
tur tibi, has res non posse concoqui ab
homine, nihilo sis securior, cum istud nō
posse, oriatur, nō à defectu simpliciter ca-
loris,

loris, sed à defectu talis caloris. Alius calor columbæ, alius struthioni, alius conchylibus, alius homini, alijs rebus alius: unde fit, vt cibos alios alia res coquat, ferrum struthio, columba lapidem, conchyliia limum, homo gallinam, suum quæquæ res cibum, pro caloris sui modo aut modulo, duriorē aut molliorem. Concilio verbo meo auctoritatem, ex verbis doctissimi Rubei, nè me putes solum sic sapere. *Calor* (inquit ille) *innatus*, non est *vnus rationis*, in omnibus speciebus, facit namq; in columbis, quod nō in struthiocamelis. In struthiocamelis, ferrum coquit, quod nō in coturnicibus, quæ tamen veratrum, seu sturni cicutam, optimè in alimētum vertunt. Satisquæ comperitum est, anates, quæ in paludibus & stagnis viuunt, bufones aquaticos deuorare, & ijsdem nutrirī, vt ciconia venenosis & mortiferis serpentibus, & gallinæ interdū scorpionibus, serpentibus, araneis, & huiusmodi animalibus, quæ cum nō possit calor humanus vincere, superatur, vt quasi venenum fiant, vniuersaquæ corporis nostri membra in venenatam naturam vertantur. Stella quoquæ, marinus piscis, cochleas integras

deuorat & comminuit. Refert enim Rondeletius, dissecuisse se vnā, apud Magalonam, in cuius ventre quinq; cochleas inuenit, tres integras, duas iam cum suis testis confectas, nec tamen pede maior erat. Plinius etiam autor est, si auro liquefcenti gallinarū membra misceantur, consumi, earum tamen nos carne vesci & nutriripotimus. Adhuc, Cuiusroes asserit, aurū si struthionibus esui p̄beatur, statimq; è stomacho extrahatur, diminutum admodū reperiri, cum tamē ab igne difficilē patiatur. Id autē dici non potest fieri, quod sit validior struthionis caliditas, ea, quæ in igne est, verū ab ipsa caliditatis natura, & tota calidi substantia. Quam ob rem id quod diximus, satis patet: calorem innatum, non vnius rationis in omnibus speciebus esse. Hec Rubeus; quibus nihil posset dici, aut ad hanc rem explicandā aptius, aut ad nostram sententiā confirmandam accommodatius.

II. DISC. Anteuertisti me, & orationem meam quasi interceptisti. Volebā quidem ex te sciscitari, quid causæ est, (si calori coctio tribuenda sit) cur animalia grandiora & calidiora non possent conficere id, quod

quod conficiunt & minutiora & frigidiora. Sed quia Rubeus clarè hoc docuit, ego acquiesco. Vide mihi, & excute extremū hoc argumentum. Omnes non videmus ^{12.} rationē, etsi omnes experiamur, res plurimas posse esse hominibus alimento, quæ tamen sumptæ, vix, ac ne vix quidem possunt in ventriculo coqui. Integros ingerimus, integros egerimus cortices & pediculos fructuum, tunicas & membranas carniū, cartilagine earum & colligationes, ouorū ad duritiem coctorum albumina, & id genus alia. Si causam quæram, respondebis fortassè tu, tenuiorem esse calorem insitum, quàm vt res tam frigidas possit coquere. Non satis profectò commodè, nam calor ventriculi res multò frigidiores coquit, lactucam, endiuia, cichoream.

PRÆC. Si causam quæras, cur illa non coquantur, respondebo, non quod tu auguraris, frigiditatē ventriculi, sed rerum, quas dixisti, vel duritiem vel asperitatem vel insolentiam. Vt rem planè intelligas, perpende mecū plurimas causas non cō-

coquendi, cum tu sic ratiocineris, quasi sola cibi non coquendi ratio, esset debili-
or ventriculi caliditas. Perpēde primum
de duritie rei coquendæ. Hanc impedire
coctionem, argumento est, quod tenerio-
ra & molliora arborū germina, ossa, colli-
gationes, cartilagines animalium, aliaque
id genus, quibus siccitas non induxit du-
ritiem, conficimus & concoquimus, quæ
tamen, propter siccitatē durata, frangunt
prius, quàm franguntur, & exeunt potius
integra, quàm naturam aliti ingredian-
tur. Dura enim non conteruntur & com-
minantur facilè. Cōminutio hæc, & quasi
dentium molitio, etsi nō sit princeps co-
ctionis causa, facit tamen ad coctionem.
Siquidē calor in res comminatione ista
iam subactas, & facilius penetrat, & fir-
mius agit. Confirmāt hoc helluones, qui,
quod cibos etiam facillimæ coctionis, in-
tegras, & subactu dentis non paratos con-
fertim vorent, nihil indē præcerpunt nu-
tritionis, sed quo habitu eos iniiciunt, eo-
dem eijciunt. Perpendisti duritiem & per-
pende nunc asperitatem, Coctio fit, si fi-
at,

DISSERTATIO.

at, concurrente vi facultatis retentricis, & quodam quasiventriculi complexu: at venterculus res asperas nō retinet, sed reijcit, non complectitur, sed omni vi & via refugit, tanquā sibi aduersas. De insolentia siue non consuetudine, reliquum est, vt subijciam. Consuetudinem nosti alteram naturam, insolentiam verò naturā quasi nouercā. Vide consuetudinis vim, Ferrum, etsi, tanquā struthiones non possim, per naturam coquere: possumus tamen per consuetudinē eò peruenire, vt ossa, cornua, resq; alias propiores ferro, quā humano alimento, facili nō conficiamus tantum, sed etiā concoquamus. Insolentia eadē ratio. Narrant de Iaponijs, eos refugere nostrā plagā cibos, alioqui lapidissimos, & coctū facillimos. Quid ita? non assueuerunt. Ad rem. Quæ complexus es, ferē omnia, sunt vel dura, vel aspera, vel insueta. Referes ergo, quod vix, aut nē vix quidē coquantur, non ad remissiorem ventriculi calorem, sed ad rerum ipsarum vel duritiem, vel asperitatem, vel insolentiam.

D I S C. Dicis quidem haftenùs probè, sed nihil ad ouum nostrum. Aueo tandem scire, cur oua sorbilia & cruda, facillimæ, albumen verò quod in ouo duratur, difficillimæ sit coctionis. At Aristoteles alia porrò mente est, qui res siuè elixas, siuè assas, contendit faciliùs coqui, quàm crudas, & ignis impressionem non expertas.

P R Æ C. Nihil faciliùs mihi, quàm de ouo respondere. Quæ nutriunt, ea oportet, & opimitate turgeant, & fluant humiditate. Opimitatem hanc ignis moderatio ab humiditate superflua depurat, purgat, & ad coctionem facit aptiorem. Hæc mens Aristotelis, statuentis subiecta igni facilius concoqui in ventriculo, quàm cruda, ignis enim moderatio purauit illam, & parauit. At si ignis fortè vehementior, hanc non solùm humiditatem, sed opimitatem etiam totā exugat, subiectamquæ rem cogat densetquæ, induitur mox durities, conditio coctioni sanè aduersissima. Vndè nemo miretur philosophus, si oua sorbilia, dum semicruda,
&

α propter opimitatem insitam adhuc prona coctioni, facilius coquantur, quàm exucca & densata in duritiem. Eadem ratio ciborum, ex farina, in crustas & diploides intortorum. Sic Cardanus comment. in lib. Hypp. de alimento, lect. 64.

DISC. Rem ita explicasti, planè ut opiner, statuendum in hanc partem. Tamen, quia tu insistis plerumq; viam peripateticorum, opinator in hanc tantum partem ero, nisi sanctè confirmes, quod clarè edisseruisti, id te verè & ex animo edisseruisse.

PRÆC. Tu profectò Peripateticus non es, qui vis esse in re clarissima opinator. Nam qui in Peripateticis sunt, probant prius quidem quàm censent, sed tādē quod censent, constanter semper defendunt. Ego (ut me intelligas) Peripateticos probo, si probè, Improbo verò, si dicant contrà rationem. Quare certò mecum, & contrà Peripateticos statue, resolutionem & comminutionem, non esse formalem (quàm dicunt) coctionis

onis rationem. Neq; hic me patior vinci, vel à tuo Achille, vel à quoquam in hac palæstra Hercule. Audiā fortassè hic. Dares Entellum : sed causæ bonitas facilè faciet, ne sim Dares. Quarè non pugno tantum pro veteri hac medicorum opinione, sed quemcumq; nouæ aduersæ sententiæ propugnatorem elicio, audacterquè prouoco in hanc arenam. Sed de resolutione numquid est reliquum ?

DISC. Dicas oro, quid censes de humore resolvente ? putasnè rem, an commentum ? Si rem putas, vbi putas ? Nam vult sanè hic noster Achilles, & rem esse, & in ventriculo esse, Oesophago, lingua, palato toto : & hunc, quia acrem, resolvere, quia resoluit concoquere.

PRÆC. Ego (vt planè dicam) contra quàm ille, censeo. Nam præter saliuam, nullum humorem naturalem agnosco. Saliuam si is fortè velit appellare humorem resoluentem, vides litem de verbo. Ea tamen neq; acris, neq; in ventriculo est. Sedes namq; illi propria os : siquidem in ore solo sunt glandulæ, quæ saliuam procreant,

procreent, aut si in ventriculo pertinaciter putet gigni, in ventriculo ostendat illas glandulas. At dixeris fortassè tu, pituitam ex ventriculo prorepere in os, diciq; vulgò saliuam. Hoc si dixeris, eris in vulgò. Nam docti omnes consentiunt, hanc pituitam nō semper in ventriculo gigni, & si quando gignatur, id esse, non ex naturali ventris habitu, sed ipsius vitio, quod Græci *σιελις μὲν* appellant. Desluit tamen cum cibis præmansis saliuam in ventriculū, quam, cum calor innatus, vt Auicenna vult, calfecit, vt Isaac loquitur, digessit: admittimus facilè coctionis causam, non principem tamen, sed adiutricem. Hic tamen vsus saliuæ est aduentitius, proprius verò ille, fauces linguam, palatum madefacere, alioqui parū, aut sanè nihil ad respirationem, vocem & deglutitionem factura. Quod autē sua natura acris non sit, lingua, gustus organum, manifestè docet. Experimur ipsam tanquam aquam, vbi naturaliter se habet, sapore destitutam. Quod si, acris interdū, acida, & falsa videatur, adsciscit id aliundè, quicquid

quicquid est saporis, non in se habet. Vide hoc in ieiunantibus, & febre biliosa laborantibus. His amarescant in ore omnia, propter bilis cum salivæ permistionem: illis varius est salivæ sapor, pro varietate vaporum, qui ex prauitate humorum, in ventriculo nati, mittuntur in os.

D I S C. Acutè tu quidem, sed est difficultas. Saliva, ieiuni præsertim, lichenem tollit, & serpentes enecat. Vnde hoc, nisi ex acrimonia salivæ?

P R Æ C. Lichenes non omnes, sed benigniores, non in omni corpore, sed periculi, per salivam curari, norunt mulierculæ. Quid tum postea? Erit ergò acris. Nequaquam. Nam non tam sua acredine, quàm vi quadam concoquendi & discutendi, hoc ipsum facit, aut si ob acredinem id fieri contendas, non multum laboro, cum dederim tibi antea, ieiunantium salivam, esse acriorem, quàm non ieiunantium, id quod de eorundem virgine, ac bile, docet Galenus. Non tamen sequitur, saliva curat lichenes, ergò facit costio-


coctionem, nisi fortè dicas, quæ curant
lichènes omnia, concoctionem facere.
Nequè illud etiam rectè concluderis, acris
est, ergò coctionem facit : cum & acc-
tum, & limonum succus, ac multa alia
acria & acida appetitum quidem ciant,
non autem concoquant. Omnes siqui-
dem medici & Philosophi confirmant,
concoctionem fieri calidis, appetentiam
frigidis. Quo fit, vt frigidi quidem ven-
triculi plus appetant, quàm concoquant,
calidi verò plus concoquant, quàm ap-
perant. Ad serpentes quod spectat, inter-
ficiuntur illæ à salina, quia tota ipsius sub-
stantia est infestissima bestiis hominem
interficientibus. Id quod ex Nicandro
poeta citat Galenus.


DISC. Tam clarè dicis, & distinctè,
vt quæ in tota hac re, difficultates, tan-
quam aggeres, se obijciunt : eas ego iam
facilè, nulla tua ope remouero. Mel,
sal, saccharum, alijs portenta, mihi nunc
sunt tricæ meræ, veræ, & (quod dixit
Plautus) germanæ gerræ. Quarè gratias,
quantas mens mea potest capere max-
imas,

imas, ago tibi, quòd tenebras, quas vanitas, & nouæ opinionis varietas mihi of-
fuderat, clarissimo orationis tuæ radio
discufferis. Sed cum tu vel naturæ confor-
matione, vel studio, refugias verborū siue
illecebras, siue nugas, quæ propius ad pal-
pum accedunt, quàm ad notionem mē-
tis veram, missas ipsas facio. Litoq; Æ-
sculapio & musis, pro salute bonoq; tuo.

PRÆC. Lita potius Christo seruato-
ri, & sanctissimæ ipsius matri, de te, de
alijs omnibus, qui in huius Academix cu-
ram incumbunt. Si me in his ponas, ego
quidem satis magnum præmium tulero.
Id ramen præ me fero, quantulus sum,
me totum esse, foreq; eorum, qui sic hæc
naturæ adyta vel rimantur, vel mirantur,
vt in ijs, non gloriam, sed veritatem, non
se, sed Deum quærant. Id quòd cum vi-
deam à te spectari maximè, liberè
libenterq; me profiteor
tuum.

Cum Licentia & Facultate Superiorum.





[viii], 72 p.

